

JEMIS

Jemis Mij Tikak

¹ Yad Jemis, God ayip Biawl Jisas Klays ayip bi wog giñeb kili midebin. Nibi binib Yislel jij anep umigan, * man ke okok ju am midebim okok, nibop mij tikebin. Midtep ginimib.

Miñel owak won ak, God nop agnigem nibop gek, gos yipid gil nigep ak dinimib

²⁻³ Mam ay yad okok. Nib nepim, miñel nibop owup okok, anib okok gos linigep nibi ak gek, nibi kiles timel gil jak midil miñel okok dem ameb. Anib ak tek, miñel keke apek koslam midebim won ak, chinop tep gakniñ miñmiñ gil yonigun agil gos nigimib. ⁴ Ak nim nibi pel kiles timel gil jak midil miñel okok dem amnimuñ. Pisnep amek, nibi God nop chig tep gil gos nigtep gil, God binib telep ne yibil midem tap ne olap ma tek dup. ⁵ Nibop oginap pen gos tep yipid gil nigep ak wulep yapek, God nop agnigem nibop gos tep yipid gil nigep ak ñinigab. God bi binib kilop ditap yibil gup ak, kilop midupsek pel tap kuñay yibil monmon ñub. Pen nop agnigel, yip taynen agnepim agil, ma keligup. ⁶ Ak pen, God nop

1:1 Mat 13.55, Mak 6.3, Apo 15.13, Gal 1.19, 1 Pi 1.1 * **1:1** Takaw anib ak, Yislel binib jij ak, takaw pal adar lil agak. Jemis ne God binib ne midupsek lum awl midebal okok kilop niñid, anib agak.

1:2-3 Apo 5.41, Lom 5.3-5, Hib 10.34, 1 Pi 1.6-7, 4.13, 4.16 **1:5** 1 Kin 3.9-12, Snd 2.3-6, Jon 15.7, 1 Jo 5.14-15 **1:6** Mak 11.24, 1 Ti 2.8

agniginig, nop gos liniñid agniginigel, gos omiñal niñid ma agniginigel. Kili chinop niginigab akan ma niginigab agil, gos omiñal niñid agnepal ak, yigen dil ñig solwala pagup tek ak midebal. ⁷⁻⁸ Binib anib okok tek, gos nigtep gil ma gel amub. Gos ak gos ak nigilig gel amub ak nim, kili Biawl ak nop agnigon, tap okok chinop ñinigab agil gos ak niginigel tek ma lup. Tap olap kilop ma ñinigab.

Binib yimgeptek okok sek, binib tap kuñay mideb okok sek takaw ak

⁹ Pen mam ay yimgeptek okok, God kilop nigeek yib awl midebal anib ak tek, kilop tep gaksiñ miñmiñ ginigel. ¹⁰ Pen mam ay tap kuñay mideb okok, God kilop nigeek yib ma midebal anib ak tek, kilop tep gaksiñ miñmiñ ginigel. Taynen? Binib tap kuñay yenigab okok, nag sum tek lug yownigab. ¹¹ Chin nopun, sub ak lim gil, adek alan amil sij timel niñid, asiñap okok midupsek milep gup. Milep gek, nag sum abe milep gil lug yapek, sum teplep ak kul gup. Adek anib ak nep, binib tap kuñay yenigab okok, wog kili gi dad amnilaksiñ kul ginigabal.

God ne chinop pel ditep gil, tap si tap timel okok chinop ma lipig dad owup

¹² Binib kilop miñel apek, kiles timel gil jak midil miñel okok del amub ak, miñmiñ ginigel tek lup. Kili God nop chig tep gel nigeek nop tep gup ak nim, tap teplep yibil kilop ñinigab. Tap teplep anib ak anigil mideb, kili pel pelnep yenigabal. Pen binib

1:7-8 Jem 4.8 **1:9** Jem 2.5 **1:10** Sng 37.2, 90.5-6, 1 Ko 7.31,
1 Pi 1.24, 1 Jo 2.17 **1:10** Ais 40.6-7 **1:12** Snd 3.11-12, 2 Ti 4.8,
Hib 12.5, Jem 2.5, 1 Pi 5.4, Lep 2.10

anib okok nop mapen lipal okok, kilop ginigayn agak tek ginigab. Anib ak tek kili miñmiñ ginigel tek lup. ¹³ Binib kili chin gi timel ginigun agil gos ak apek, God chinop gos ñek chin gos timel nopun agil ma aginigel. Chin nopun, God tap timel ginim agil gos ak ownimunj tek ma yibil lek, God binib kilop gos timel anib ak tek ma ñinigab. ¹⁴ Binib keke pen gos kili ke nepal adek ak niñid, chibol nab ayan ak tikjakek kilop lipig dad amek, tap si tap timel ginig gipal. ¹⁵ Gos kili ke nepal anib ak kilop lipig dad amek, tap yin tek yimel jakil, kidil am wos gup tek ak tap si tap timel gipal. Pen tap si tap timel gipal anib ak, mid mid pisnep awl gil, kilop gek kuba.

¹⁶ Mam ay mapen yad okok, gos nigtep ginimib, gos yepis ak ma dinimib. ¹⁷ Tap telep titay dil, tap yipid gil titay dipun okok, midupsek God man ne alanj nib owup. Bapi God ne milek adekab alanj gilak ak nep, ne tap telep midupsek chinop ñub. Milek adekab alanj okok, minek minek amil apil adikid ke okok abal. God pen, ne anib ak tek ma mideb. Takaw ne agup ak ma keliginigab, gos olap kidek ma niginigab. ¹⁸ Gos ne ke niñid chinop gek, takaw niñid yibil ne ak niñid donok nim, ñapay tep ne midobun. Ne anigek, chin tap malep ned midup miñmiñ gilig pipag gipal tek ak midobun. Chin ned midobun, tap ne gilak okok muk chin okok mideb.

God takaw ne ak niñid kidek ginigun

¹⁹ Mam ay mapen yad okok, nibi anib ak nigtep ginimib. Nibi nokom nokom midupsek okok,

1:14 Lom 7.7-10 **1:15** Sng 7.14, Lom 5.19-21 **1:17** Mal 3.6, Mat 7.11, Jon 3.27, Lom 11.29, 1 Ko 4.7 **1:18** Jon 1.13, Epe 1.12, Jem 2.3, 1 Pi 1.23, Lep 14.4

takaw agñilakniñ kasek niñinimib. Pen takaw aginig, kasek ma aginimib. Pen kasek milik ma niñinimib. ²⁰ Chin nopun, binib milik nepal okok, kili God agak tek kidek ginigel tek ma lup. ²¹ Anib ak tek, tap timel gil gach midebim ak sek, tap si tap timel ginigun agil gos nepim ak sek, midupsek keligil diyokinimib. Diyokil, binib tam okok tek midil, takaw God gos nibi nab ayan yimub ak dinimib. Takaw anib ak nibop ginimuñ tek lek, God nibop tig asik dinigab.

²² Pen takaw dipim anib ak timud ak nep pak ma niñinimib. Ak yepis gipim. Agup nep tek kidek ginimib. ²³ Pen binib takaw ne timud ak nep pak niñid, agup tek kidek ma gipal okok, kili binib jomulik ñig kawnan pag nepal tek ak gipal. ²⁴ Ñig kawnan pag niñid, jomulik kili ke tay tek mideb agil nigtep gipal ak pen, kelig amil kasek sawl gipal. Sawl gil, taydil tek mideb agil ma nepal. ²⁵ God takaw teplep yibil ak chinop gek, tap si tap timel gep ak keligil koñim amobun. Pen binib takaw anib ak nigtep ginigun agil, nigilig yibil gel ameb okok, God kilop kod yek, titay ginigabal ak am tep ginigab. Kili timud ak nep pak niñid sawl ma gil, agup nep tek kidek gipal.

²⁶ Binib oginap, kili God nop kidek gil, nop kigom yimil agnigep anib ak yipid gil yibil gipun agil gos nepal. Kili pen jonib kili ak nigtep gil ma agil nim, yepis agilig ke nep gilig midebal. Binib anib okok,

1:20 Snd 10.19, 17.27, Sav 5.1-2, 7.9 **1:21** 1 Ko 15.2, Kol 3.8, Hib 2.3, 1 Pi 1.9, 2.1 **1:22** Mat 7.21, 7.26, Luk 6.46, Lom 2.13, 1 Jo 3.7
1:23 Luk 6.47, Jem 2.14 **1:25** Jon 13.17, Lom 8.2, 2 Ko 3.18, Jem 2.12 **1:26** Sng 34.13, 39.1, 141.3, 1 Pi 3.10

kili God nop kidek gil nop kigom yimil agnigep anib ak, God nigek tap yokip tek lup. ²⁷ Pen nibi God nop kidek gil, nop kigom yimil agnigep ak yipid gil yibil gilig, Bapi God widin adek sinjak gach sek ma yonigun agil, aniginimib. Napay amonluk okok sek, bin kanil okok sek mijel dipal okok, kilop amil ninid ditep ginimib. Pen abe, gos binib lum awl nepal ak, gos anib ak nibop gek God widin adek sinjak gach sek ma yenimib.

2

Nibi binib adip adip midebal ak ninid, gos nigtep gil kilop bilok linimib

¹ Mam ay yad okok. Nibi Biawl chin tep yibil ak Jisas Klays nop gos linepim tek, binib adip adip midebal ak ninid, gos nigtep gil, kilop midupsek adek nokom anib ak nep bilok linimib. ² Pen nibi God nop gos ninid apnan ginigabim won ak, bi olap chech teplep lil, lin gol dil gilak oginap nin midup ne lil apenigab. Pen abe bi yimgeptek olap chech wul lil timel gup ak lil apenigab. ³ Anigek, tay dinigabim? Bi chech teplep lup ak nop ninid aginigabim, Owan, besigep tep nim ak besiginimin aginigabim akan? Pen bi yimgeptek ak nop ninid aginigabim, Nad am gol okok jakil nep midil akan, lum awl tob agen yad okok besigan aginigabim akan? ⁴ Anigenigabim, yipid ma ginigab. Nibi gos nigtep gil, binib okok midupsek adek nokom anib ak nep ma bilok linigabim. Mel. Nibi ke gos timel ninid, anigil binib kilop bilok linigabim.

⁵ Mam ay mapen yad okok, nibi niġim. God binib lum awl yimgeptek midebal okok kilop aglek, kili Klays nop gos linigel amniġab. Pen kili abe nop mapen lel niġid, ne binib dil kilop kod yenigab n̄in ak, binib anib okok kilop dinigab. Takaw God ne binib anib okok kilop ġinigayn agil aglak anib ak, ne ġinigab. ⁶ Nibi pen binib yimgeptek okok yib kilop taw achip achip ġipim. Niġim. Binib an yil nibop ġi timel gel koslam midem, nibop damil bi takaw tiġ asikep ak yil dad abal? Binib tap kuġay mideb okok nep. ⁷ Pen Klays nop chig tep ġipim ak, ne yib awl mideb ak pen, binib an yil yib anib ak agjupal? Binib tap kuġay mideb okok nep.

⁸ God ne binonim chin mideb ak, ne takaw kiles olap agek takaw Mosis n̄u kil tikak ak miġan ayan tikil agak, Nad ke mapen lipan tek, binib oġinap kilop abe ġinimin agil tikak. Pen God anib agak tek yipid ġil kidek ġipim ak, tep yibil ġipim. ⁹ Nibi pen binib adip adip midebal ak niġid, gos niġtep ġil, kilop midupsek adek nokom anib ak nep ma bilok lipim ak, tap si tap timel ġipim. Takaw Mosis n̄u kil tikak ak nibop yomub, nibi bi takaw tibilikep okok midebim. ¹⁰ Binib takaw Mosis n̄u kil tikak ak midupsek niġ dil kidek ġipal ak pen, takaw nokom olap tibilikipal ak, God niġek takaw midupsek tibilikipal. ¹¹ Chin nopun, God ne anib agak, Binbi nibi dipim ak, bin si bi si ma

2:5 Mat 5.3, Jon 7.48, 1 Ko 1.26-28, 1 Ti 6.18, 2 Ti 4.8 **2:6** Apo 13.50, 18.12, 1 Ko 11.22, Jem 5.6 **2:8** Wkp 19.18, Mat 19.19, 22.39, Lom 13.8-9, Gal 5.14 **2:9** Lo 1.17 **2:10** Lo 27.26, Mat 5.19, Gal 3.10 **2:11** Kis 20.13-14, Lo 5.17-18, Lom 13.9

ginimin agak. Pen abe agak, Binib ma ñaglinimin agak. Anib ak bin si bi si ma ginigaban ak pen, binib ñaglenigaban, nad bi takaw Mosis ñu kil tikak tibilikep ak mideban. ¹² Anib ak takaw titay agnig akan, tap titay ginig, gos anib ak niginimib. God takaw telep yibil ak nibop gek, tap si tap timel gep ak keligil konim amebim ak, God takaw anib ak ninid, nibop tig asik bilokinigab. Anigil gos ninid, takaw agil tap okok gil ginimib. ¹³ Nigim. Binib kili binib oginap mapen ma nepal okok, God kilop tig asik bilokinigab ñin ak, kilop mapen ma niginigab. Binib kili pen binib oginap mapen nepal okok, God binib kilop tig asik bilokinigab ñin ak, kilop mapen niginigab.

Klays nop gos linopun ak pen, gitep ma gipun ak, gos linopun anib ak tap yokip

¹⁴ Mam ay yad okok. Bi olap ne agup, Yad Klays nop gos linepin agup ak pen, abe gitep ma gonimuñ, gos linigup ne ak tap yokip tek lup. Pen gos linigup anib ak tek bi anib ak nop tig asik dinimuñ tek lup akan? Mel yibil. ¹⁵ Mam ay olap pel chech ma midil, tap midup ma midil gup ak ninid, ¹⁶ nibi nop aginigabim, Nad kimigel midtep gil amnon, chech telep lil, tap midup kunay ñinjinimin agenigabim ak pen, tap dam ñilig mel, takaw anib ak nop titay dil giniginigab? ¹⁷ Adek anib ak nep, Klays nop gos linigep ak ne ke midil, tap gitep gep ak ayip jimñil ma midil nim, Klays nop gos linigep anib ak kumub tek lup.

2:12 Gal 6.2, Jem 1.25-26, 1 Pi 2.16 **2:13** Snd 21.13, Mat 5.7, 18.32-35, 25.41-42, 1 Jo 4.17-19 **2:14** Mat 7.21, 7.26, Jem 1.23

2:15 Jop 31.19-20, Luk 3.11, 1 Jo 3.17 **2:17** Jem 2.20, 2.26

18 Bi olap pen aginigab, Binib oginap Klays nop gos linepal, binib oginap tap gitep gipal aginigab. Pen takaw aginigaban anib ak, nep pen aginigayn, Nad Klays nop gos linepan ak pen, tap gitep ma ge nim, nad Klays nop gos linepan ak titay dil niginigayn aginigayn? Yad pen tap gitep gen, nad niginigaban, Klays nop gos linepin. 19 Nad God nokom yibil mideb agil, gos nepan ak tep gipan. Kicheki walijpal okok abe, gos anib anep ninid, pilikil jep dipal. 20 Nad bi sawl sek. Klays nop gos linigep ak ne ke midil, tap gitep gep ak ayip jimnil ma midil nim, Klays nop gos linigep anib ak tap yokip tek lup. Takaw anib ak jij ak niginig mideban akan? Ak nigan. 21 Based chin Eblaham ne ñine Aysak nop dil, God nop sibogep abañ adek ak lil, God nop tap pak sibog ñeb tek ñak. Anib won ak God ne Eblaham gak ak ninid nop gek, ne God bi suntep ne yek.* 22 Pen anib ak abe gos niginimin. Eblaham God nop gos linigak abe, gitep gak abe jimnil lak. Jimnil lek, gitep gep ne ak gek, gos linigep ne ak tep yibil kiles timel gil yek. 23 Agesipin anib ak, buk Baybol takaw olap tikak ak jij ak yomub. Tikil anib agak, Eblaham ne God ninid agup agil, nop gos linigak ak nim, God agek bi suntep ne yek agil tikak. Pen abe God Eblaham nop agak, Bogilak yad agak. 24 Anib ak miñil nepim, binib God nop gos linepal ak pen, gitep ma gipal okok, kili binib suntep yad okok yenigel agil gos ma nigup. Ne pen gitep gipal ak abe ninid, kilop gek

2:18 Gal 5.6, Jem 3.13 **2:19** Mat 8.29, Luk 4.34, Apo 16.17 **2:21**

Stt 22.1-14 * **2:21** Kesim anib ak, buk Stat 22.1-19 niginimin.

2:22 Hib 11.17-18 **2:23** Stt 15.6, 2 Sto 20.7, Ais 41.8, Lom 4.3, 4.9, 4.22, Gal 3.6

kili bi sunṭep ne midebal.

²⁵ Anib ak tek nep, bin Layap gak. Ne kanibtam bin yoligup ak pen, bi Yislel ominal kili Layap taun ne niginig apelek, kilop ditep gil agyokek, kili pilik kanib adek olap amil amnilek. God ne Layap gak tek niṇid nop gek, ne God bin sunṭep ne yek. ²⁶ Chin nopun, binib wak nep midil, kawnan sek ma midebal ak, kim yenigel tek ma lup, pisnep kubal. Anib ak tek nep, binib Klays nop gos linopun agil gos nepal ak pen, tap gitep ma gipal ak, kili Klays nop gos ma linepal. Gos linepal anib ak pisnep kumub.

3

Takaw chin ak kod midtep ginigun

¹ Mam ay yad okok. Nibi kuṇay Klays binib ne kilop takaw agnitep gep wog ak ma ginimib. God ne binib kilop tig asik bilokinigab nin ak, chin Klays binib ne kilop takaw agnitep gep wog ak gipun okok, chinop wog gipun okok tig asik tep ginigab. Anib ak nibi kuṇay agnitep gep wog ak ginigun agil gos ma niginimib. ² Chin midupsek yipid ma gup adek okok keke gipun. Binib olap pen takaw ne kod midtep gil, monmon ma agil takaw yipid gil nep agup ak, ne binib teplep yibil mideb. Ameb owep ne ak, mubwak ne ak midupsek kod midtep gonimun tek lup. ³ Chag hos okok awl yibil ak pen, chin tap ayn sikol pal olap nag sek tun gil, di meg migan ak lipun. Lil, amnig gipal okok yil lipigon, gos chinop ak kidek gil abal. ⁴ Sip ninig solwala ajeb

2:25 Jos 2.1-21, Hib 11.31 **2:26** Jem 2.17 **3:1** Mat 23.8, 23.14,
Luk 6.37, 12.47, 1 Pi 5.3 **3:2** 1 Kin 8.46, Snd 20.9, Mat 12.37, 1 Jo
1.8

okok abe gos nigim. Sip anib okok awl yibil, yigen awl apil dad amub ak pen, tap ñin midup dep ak sikol olap ne yipid gil dad amub. Bi sip kod mideb ak, tap sikol anib ak dek, gos ne akal amnig gup okok dad amub. ⁵ Anib ak nep yalib chin ak ne mubwak day sikol yibil olap tek mideb ak pen, takaw kunjay yibil agil agup, Wog awl yibil ginigayn agup.

Chin nopun, tap milep sikol bad olap sup ñel, yin dad amil, be okok midupsek yinimun tek mideb. ⁶ Pen yalib ak abe mab minilan tek mideb. Mubwak day chin ak, timel anib ak tek olap sek ma mideb. Yalib ak ameb owep chinop ak midupsek gi timel gup. Pen yalib ak mubwak midupsek gek, mubwak ak gach midil, tap timel gil, pel gi dad amil, yin dad amil mubwak midupsek yinimun tek amub. Mab minilan anib ak, mab ke yineb migan ak nib owup.

⁷ Binib okok kili tap okok midupsek dad apil mukipal. Kili sab chag, yawl, yoy, tap be okok mideb okok sek, kubsal, kipi tap ñig solwala okok mideb okok sek, midupsek dad apil mukel, gos nepal. ⁸ Gos nepal ak pen, yalib chin ak agon, gos niginimun tek ma mideb. Minek minek yalib ak tikjakil, takaw timel agup. Kuj timel binib kubal tek ak jonib adek chin ak mideb. ⁹ Yalib chin ak, Bapi Biawl ak yib nop ak dad aplanibun. Pen abe yalib chin ak, binib ne tek gos ninid gilak okok, kilop agjulig kili timel gilan agil kilop takaw timel apun. ¹⁰ Meg migan nokom anib ak nep, takaw tep

3:5 Sng 12.3, 73.8-9, Snd 12.18, 15.2 **3:6** Snd 16.27, Mat 12.36-37, 15.11, 15.18-19, Mak 7.15, 7.20, 7.23 **3:8** Sng 140.3, Lom 3.13
3:9 Stt 1.26, 5.1, 9.6, 1 Ko 11.7

agilig timel agilig gipun. Mam ay yad okok, taynen aniginigun? Ak tep ma gup, ma ginigun. ¹¹ Ñig kilam nokom olap juwil, ñig yidek oginap, ñig silek oginap owup akan? Mel. ¹² Pen mam ay yad okok. Mab pik olap mab olip midup pulinimun tek lup akan? Mel. Nag wayn midup olap mab pik midup pulinimun tek lup akan? Mel. Anib ak nep ñig migan silek tek ak, ñig kim tep malep tek ma linigab.

Gos nigepe God man ne alañ nib owup ak, chinop gek gitepe gipun

¹³ Binib nibi oginap bi gos nigepe ak midil, gos nigtepe yibil gipal akan? Binbi anib ak tek yenigabal, pel gitepe gil kanib tep adek ak amnigel. Nigtepe gil, binib ayip kimigel midon agil, yib kili ke dad ma aplanigel. Gel, binib oginap gitepe gipal anib ak nigiginabal. ¹⁴ Pen chibol nibop ak timel yibil gil, gos nibi nab ayañ yilik gek milik niñid nim, yib nibi ke dad ma aplanimib. Chin binib gos nigepe tepelepe yibil midobun agil gos niñid, miñmiñ ma ginimib. Takaw yepis anib okok agil, takaw yipil yibil ak ma taw yu ginimib. ¹⁵ Gos nigepe anib ak, God man ne alañ nib ma owup. Mel. Gos nigepe anib ak, tap lum awl yil ak, binib mubwak gos nab ayañ nedil gos ak, kicheki gos nigepe ak. ¹⁶ Nigim. Binib chibol kilop ak timel yibil gil, gos kili nab ayañ yilik gek milik nepal ak, timel adek ak gil monmon gel amek, midtepe ma gipal.

3:13 Gal 6.4, Jem 1.21, 2.18 **3:14** Lom 2.17, 2.23, 13.13 **3:15** Plp 3.19, Jem 1.5, 1.17 **3:16** 1 Ko 3.3, Gal 5.20

17 Pen gos niŕep God man ne alaŕ niŕ owup ak, binib kilop gek aniŕipal. Ned ak, kili God wiŕin adek siŕak gach sek ma miŕil tep adek ak giŕal. Pen kili kimigel miŕtep giŕ, binib kilop sayn tep yiŕil miŕil, takaw agel niŕid kiŕek giŕal. Kili binib kilop mapen niŕid, diŕtep yiŕil giŕal. Kili binib adip adip miŕdebal ak niŕid, gos niŕtep giŕ, kilop miŕdupsek adek nokom aniŕ ak nep bilok lipal. Kili tap tay teplep giŕal ak yepiŕ ma giŕal. 18 Aniŕ ak niŕ, binib kimigel miŕtep giŕal okok, kili binib tap yiŕ yiŕbal tek miŕdebal. Binib tap yiŕ yiŕmel, jak awl giŕ, miŕdup teplep pulup. Aniŕ ak tek nep binib kimigel miŕtep giŕal okok, kili aniŕgel, binib kuŕay yiŕil God agak tek kiŕek giŕal.

4

Tap lum awl yiŕ ak keligiŕ, God nop chiŕ tep giŕniŕgun

1 Tap aniŕ ak tay niŕop gek, kabiyam juwiŕ penpen agil ag giŕipim? Mubwak gos keke nab ayaŕ miŕil, tap aniŕ okok gek gos nab niŕi pi ak penpen pakiliŕ miŕdebiŕ. Niŕid apin akaŕ? Yaw, niŕid apin. 2 Tap diŕniŕ nepim okok, kiles giŕ gos nepim ak pen ma diŕipim. Aniŕ ak tek binib kilop paklem kubal. Tap tep okok diŕniŕgun agil gos nepim ak pen, diŕniŕmiŕ tek ma lup. Aniŕ ak tek kabiyam juwiŕ penpen agil ag giŕipim. God nop agniŕid diŕikep ak pen, nop ma agnepim. 3 Pen nop agnepim won ak,

3:17 Lom 12.9, 1 Ko 2.6-7, 1 Pi 1.22, 1 Jo 3.18 **3:18** Snd 11.18, Ais 32.17, Mat 5.9, Plp 1.11, Hib 12.11 **4:1** Lom 7.23, Gal 5.17, 1 Pi 2.11 **4:3** Sng 66.18, Ais 1.15, Mai 3.4, Sek 7.13, 1 Jo 3.22

gos tep niñid ma agnepim. Wak chinop ke tep gan agil agnepim ak nim, apim tek ma gup.

⁴ Nibi binib God nop keligil chig tep ma gipim okok, taynen anigipim? Binib gos kili tap lum awl yil yibil amub okok, kili God nop milik niñid penpen gipal. Anib ak kili gos kili tap lum awl yil yibil amnimuñ agil gos nepal okok, kili God binib penpen gep ne okok midebal. Anib ak ma nepim akan? ⁵ Adek anib ak buk Baybol ak tikil agak, God ne Kawnan ne ak dil, nab chinop lek, Kawnan ne ak kili God nop chig tep gil muk okok yenigel agil, anib ak kiles gil gos nigup agil tikak. Nibi takaw anib ak nigem yokip tek lup akan? Mel yibil. ⁶ God pen chinop yimug awl niñid gitep yibil gup. Anib ak tek, buk Baybol ak tikil agak,

Binib chin ke binib awl midobun agil apal okok, God kilop gek apyap pakipal agil tikak. Binib pen chin bi tam okok tek midobun agil nepal okok, kilop yimug niñid gitep gup agil tikak.

⁷ Anib ak nibi God agak ak niñid kidek gil, nop muk okok yenimib. Kicheki biawl ak nop mel agil jak kiles gil midem, nibop kelig pilik amnigab. ⁸ Pen God yil amil midem, nibop apil kod yenigab. Nibi binib tap si tap timel gep okok, ñin gach gup ñig li yokipal tek, tap timel midupsek wik yokilig yenimib. Pen nibi gos omiñal nepim okok, gos timel nibi nab ayañ mideb ak keliginimib. ⁹ Chib gakniñ chan awl agilig yenimib. Yimel apim ak

4:4 Jon 15.19, 17.14, Lom 8.7, Gal 1.10, 1 Jo 2.15 **4:5** Stt 6.5, Kis 20.3-5, Nam 11.29, Snd 21.10 **4:6** Sng 138.6, Snd 3.34, Luk 14.11, 1 Pi 5.5 **4:7** Epe 4.27, 6.11-12, 1 Pi 5.7 **4:8** 2 Sto 15.2, Ais 1.16, Sek 1.3, Mal 3.7, Jem 1.8, 1 Jo 3.3

keligil, chaŋ linimib. Miñmiñ gipim ak keligil, chibol yul gakniŋ yenimib. ¹⁰ Chin binib tep ma midobun agil, Biawl nig mideb tek nop muk okok yenimib. Anigil midem, nibop dad aplanigab.

Chin binib oginap kilop takaw ma agjunigun

¹¹ Mam ay sikop, mam ay oginap kilop takaw timel agil ma agjunimib. Bi olap mam ay kilop takaw timel agil agjup akan, kilop tig asikil ag gup ak, ne takaw Mosis ñu kil tikak ak abe takaw timel agil agjuwil, tig asikil ag gup.* Pen nad takaw Mosis ñu kil tikak ak tig asikil ag gipan ak, takaw anib ak kidek ma gil muk okok ma midil, yad ke biawl tig asikep midebin agil anigipan. ¹² Pen bi nokom takaw binib ginigel ma ginigel ak agñil, bi binib kilop tig asik bilokep ak mideb. Ne nokom binib tig asik dinimun tek lil, abe gi timel ginimun tek lup. Anib ak tek nad bi an, yad biawl midebin agil mam ay kilop tig asikil ag gipan?

Biawl ne chinop tap olap yaw agonimun, ak chin ginigun

¹³ Pen nibi oginap apim, Miñil akan tol tek, taun olap amil, anib okok sub nokom olap mani wog ak gil, mani awl dinigabun apim. Anib apim ak, nigtep ginimib. ¹⁴ Tap tol ownigab ak, nibi ma nepim. Miñil konim midebim ak pen,

4:10 Jop 5.11, 22.29, Mat 23.12, 1 Pi 5.6 **4:11** Luk 6.37, Lom 2.1, Epe 4.31, 1 Pi 2.1 * **4:11** Bi gos nigep oginap, kili anigil gos nepal. Jemis ne takaw Mosis ñu kil tikak ak gos niñid, takaw layn 11 mideb ak tikup. Takaw Mosis ñu kil tikak anib ak, buk Wok Pris 19.18 niginimin. **4:12** Mat 10.28, Lom 2.1, 14.4, 14.13 **4:13** Luk 12.18-20 **4:13** Snd 27.1 **4:14** Sng 39.5, 39.11, 102.3, Jem 1.10, 1 Pi 1.24

konim midebim anib ak, wisip bad sikol mideb tek midebim. Won ak mideb, won ak kimigel kul gem amub. ¹⁵ Gup anib ak tek, nibi anib aginimib, Biawl ak ne yaw agenigab, chin konim midil, wog anib anib ginigun agil gos nopun ak ginigabun aginimib. ¹⁶ Pen miñil gebim ak, yib awl dipun agil yib nibi ke dad aplanebim. Yib nibi ke dad aplanibim anib ak, tap timel yibil gipim. ¹⁷ Anib ak nigtep ginimib. Nibi gitep gep ak niñid aniginigun agil nepim ak pen, ma gipim ak, anib ak nim tap si tap timel gipim.

5

Nibi binib tap kuñay mideb okok, nigtep ginimib

¹ Nibi binib tap kuñay yibil mideb okok, takaw aginigebin ak nigim. Chin koslam midil miñel awl yibil dinigobun agil, suk awl agil chan linimib. ² Tap telep nibi kuñay mideb okok timel gil kuyig yowup. Kichil gilobid chech tap nibi okok su tikup. ³ Tap gol, tap silpa nibi okok mok ñiñub. Pen mok ñiñub anib ak nibop gek, tap si tap timel gipim ak misen lek nigtep ginigabal. Pen mok ñiñub ak, wak nibop mab yin sibok ameb tek ginigab. Ñin kidek ak wulep mideb ak nim, tap nibi kuñay yibil dap nan gebim okok, yokip yibil nan gebim. ⁴ Nibi nigtep ginimib. Binib wog giñeb nibi okok, kili tap wog nibi okok pipagipal. Pipagipal ak pen, kilop takaw yepis agil, mani kilop ñitep ma gipim.

4:15 Apo 18.21, 1 Ko 4.19, Hib 6.3 **4:17** Luk 12.47, Jon 9.41, 15.22, Lom 1.20-21, 2.17-18, 2.23 **5:1** Snd 11.28, Luk 6.24, 1 Ti 6.9 **5:2** Jop 13.28, Jem 2.2 **5:2** Mat 6.19 **5:4** Lo 24.14-15, Jer 22.13, Mal 3.5

Anigem, mani anib ak God nop suk agil agup, Nad biawl anib okok kilop pen gi timel ginimin agup. Pen binib wog giñeb nibi anib okok kili suk agil agel, Biawl kiles midupsek di midep ak ne nigup. ⁵ Pel lum awl midebim won ak, tap teplep kuñay dil, wog wali ma gil, yokip midil miñmiñ gi ajipim. Anib ak nibi chag bulmakaw okok muk tep gil, silin gek pakñibal tek midebim okok, won pal ma yenigabim. ⁶ Nibi binib sun tep midebal okok kilop tig asikil ag gil, paklem kubal. Kili pen nibop ma ag gipal.

Yilik ma niñid jak kiles gil midil, God nop kod yonigun

⁷ Anib ak mam ay sikop, yilik ma niñid jak kiles gil midil, Biawl adikid ownigab ak kod yenimib. Nib nepim, binib tap wog gi yimub okok, tap ñineb tep ak jakinimun agil kod midebal. Yilik ma niñid kod yelakniñ, man pakil sub niñid, jakek nep ñibal tek dinigabal. ⁸ Nibi abe Biawl adikid ownigab ak yep wulep mideb agil, yilik ma niñid jak kiles gil midil, gos sek kod yenimib.

⁹ Mam ay sikop, mam ay oginap kilop ma ag ginimib. Mel ak, God ne nibop tig asik bilokinimun. Nigim. Bi tig asikep ak ne wulep apil, kanibtub jak mideb. ¹⁰ Pen mam ay sikop. Bi God gos ñek agñeb okok kili bilel midil, Biawl takaw ne agñilak ak, kilop gos niginimib. Binib oginap bi anib okok kilop gi timel gilakniñ, miñel awl yibil deligipal ak

5:5 Jer 12.3, 25.34, Amo 6.1, 6.4, Luk 16.19, 16.25, 1 Ti 5.6 **5:7**
 Lo 11.14, Jer 5.24, Hos 6.3, Jol 2.23, Sek 10.1, Luk 21.19 **5:8** Lom
 13.11-12, Plp 4.5, Hib 10.25, 10.37, 1 Pi 4.7 **5:9** Mat 24.33, 1 Ko
 4.5, Jem 4.11 **5:10** Mat 5.12, Hib 11.35

pen, yilik ma niñid jak kiles gil yelak. Adek anib ak nep ginimib. ¹¹ Niğim. Binib anib ak tek yilik ma niñid jak kiles gil midebal okok, kilop niñid apun, Kili miñmiñ gil midtep gipal apun. Pen bi Jop bilel yoligup kesim ak, nib nepim. Nop miñel awl apek, kiles timel gil jak midil miñel okok dak. Pen abe nepim, Jop ne anigak ñin ak, Biawl ak Jop nop gitep yibil gak. Anib ak nib nepim, Biawl ak ne binib kilop pel chib niñid ditep yibil gil, mapen yibil nigup.

¹² Pen mam ay yad okok, tap awl yibil ak anigil mideb. Nibi yad yepis ma apin niñid yibil agebin agil, takaw anigil ma aginimib. Nibi God man ne alañ sek, lum awl sek, tap titay midupsek yomil, yad yepis ma apin niñid yibil agebin agil, takaw anigil ma aginimib. Nibi pen yaw agil, yaw nep aginimib. Mel agil, mel nep aginimib. Mel ak, God nibop tig asikek takaw awl yibil dinigabim.

Chin God nop agnigon, takaw chin ak niñid ginigab

¹³ Binib nibi oginap kilop miñel gil, yipil gup ak, kili God nop agniginigel. Binib nibi oginap midtep gil miñmiñ gipal ak, kili kimep Biawl yib nop dad aplanub okok aginigel. ¹⁴ Binib nibi oginap kilop tap gup ak, kili bi Klays binib ne okok kilop kod midebal okok kilop agel ownigel. Apil, Biawl kiles mideb ak nibop gek suñ linimuj agil, ñig kuy tep owep ak kilop liñil, Biawl ak nop agniginigel. ¹⁵ Pen kili Biawl nop gos nigilig agnigel, Biawl ak ne

5:11 Kis 34.6, Jop 1.21-22, 2.10, 42.10, Sng 94.12, 103.8, 111.4, Mat 5.10-11 **5:12** Mat 5.34-37 **5:13** Epe 5.19, Kol 3.16 **5:14** Mak 6.13, 16.18 **5:15** Ais 33.24, Mat 9.2, Mak 16.18

binib kilop gek suŋ lek, tikjakinigabal. Pen tap si tap timel oginap genigel, abe tig walig giyokinigab. ¹⁶ Anib ak, tap si tap timel gipim okok, Biawl binib ne ayip penpen agyikinimib. Agyikil, Biawl ak chinop giñinimuj agil nop agniginimib. Agnigem, ne gek nibop suŋ linimuj. God binib suŋtep ne okok kili nop agnepal ak, agnepal anib ak kiles timel yibil yek, ne kiles gil giñinigab. ¹⁷ Bi Yilayja,* bi chin midobun tek yek. Ne man ma pakinigab agil, kiles gil God nop agnigek, sub omiŋal nokom, takan anep kagol ak, man ma pakak. ¹⁸ Kidek pen tepayan God nop agnigek, God gek man pakek, tap wog okok jakak.

Bi olap ne okok amub ak, nop agñi tep gem, adikid ownimuj

¹⁹ Mam ayyad okok. Bi nibi olap takaw yipil yibil ak keligil, ne okok amub, nop agñi tep genimib, adikid takaw yipil yibil ak tepayan donimuj, ²⁰ ak tep yibil gipim. Anib ak nigtep yibil ginimib. Bi olap tap si tap timel gil, takaw yipil yibil ak keligek, nibi amil nop agñi tep gem adikid ownigab ak, nibi bi anib ak nop tig asik dinigabim. God tap si tap timel titay gak okok tig walig giyokek, kumil pisnep ma kumnigab.

5:16 Lo 9.18-20, 1 Sml 12.18, 1 Kin 13.6, Sng 34.15, Jon 9.31 **5:17** 1 Kin 17.1, 18.1, Luk 4.25, Apo 14.15 * **5:17** Bi Yilayja, ne bi God gos ñek agñeb olap bilal yoligup. **5:18** 1 Kin 18.42-45 **5:19** Mat 18.15, Gal 6.1 **5:20** Sng 51.13, Snd 10.12, Lom 11.14, 1 Ko 9.22, 1 Ti 4.16, 1 Pi 4.8

Jisas Klays Takaw Teplep Ne Tay New Testament

copyright © 2013 Pioneer Bible Translators

Language: Tay (Tai)

Translation by: Pioneer Bible Translators

This translation is made available to you under the terms of the Creative Commons Attribution-No Derivatives license 4.0.

You may share and redistribute this Bible translation or extracts from it in any format, provided that:

- You include the above copyright and source information.

- You do not make any derivative works that change any of the actual words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2022-06-21

PDF generated using Haiola and XeLaTeX on 22 Feb 2024 from source files dated 29 Jan 2022

24d09cce-9a93-523a-afa5-7b091c264cee